



Oshituthi shefumviko lyomumbisofi Leonard Auala mOniipa

KuSebulon Ekandjo

Efumviko lyomudhimba gwaLeonard Nangolo dhaAuala, omumbisofi gwotango gwOngeleki onkwaevangeli paLuther yomOwambokavango, olya ningilwe pamukalo gwoshituthi oshinene eti 10.12.1983 mOniipa, mOwambo.

Omumbisofi Auala okwa manene oondjenda dhe eti 4.12.1983 moshipangelo shOngeleki ya ELOK, konima yoomwedhi mbali sho a lala moshipangelo, ethimbo ele sho a kala nuunkundi owindji megumbo lye.

Iilyo oyindji yomagongalo gongeleki ndjoka esiku lyefumviko, oya li ya kongoloka koombinga dhoshitopolwa ashihe shiita muumbangalantu waNamibia noye ya ya kale mefumviko.

Iilyo yOngeleki dhilwe wo mOwambo nopondje, odhi ile dhi gandje nadho wo euvitopamwe lyadho nAaelok, mekanitho lyomuwilikingeleki omununene muNamibia.

Oniipa oyo ehala lyuuvalwa womumbisofi konima yomimvo 75 dha piti nolyo wo oshipundi shuumbisofi mOngeleki ayihe ya ELOK, sigo onena, okuza 1963, Oshigongingeleki shOngeleki ndjoka sho sha tokola lwotango okulandula omulamndu gwopaumbisofi.

Eyambeko lyomudhimba olya

ningilwa mOngeleki yopaumbisofi komumbisofi gwa ELOK, dr. Kleopas Dumeni. Nguka oye wo a ningi euvitho enene lyoshituthi ndyoka tali monika palwe moshifo shika.

Ongula yesiku ndyoka 10.12.1983 konima naanaa yomasiku gahamano omumbisofi sho a hulitha oondjenda, aantu oya mbombolokele pegumbo lyanakusa okutala lwahugunina oshipala she.


Mboka ye mu igilile omeho ge taga adhima nomilungu dhe tadhi ime-meha kenyanu, ngashingeyi oye mu adha a thithikila nomilungu dhe itaa dhi inyenge we nando.

“Okwa silwa nawa oshimpwiyu nolupe lwe otalu monika natango lu li ngaashi lu li,” osho gumwe a nongonene ndje, manga engathithi tali ende komeho goshiketha notali mu tongolola omumati gwaKalunga a taandela.

Konima yotundi yimwe yokutala oshipala osheendo ashihe shoosa oshu uka kOngeleki moka oshituthi ashihe shootundi dhi vule ne sha ka ningilwa.

Omutonatelishitayingeleki Festus Ashipala nomutalelisikola Hans D. Namuhuja oyo ye shi wilike sigo opehulilo.

Kashona nakashona osheendo osha kwatelwa komeho komuselekadhi kuku Aina ngoka a yambidhidhwa kombinga nombinga ku Anna-Liisa Hirvela naMaria Shipanga.



Nakusa Leonard Auala

Meme Hirvela, oye gumwe a kala mehongo lyomumbisofi mombete mOshipangelo pamwe nakuku Aina noyana.

Konima yosheendo shika, okwa landula oyana yanakusa ayehe omugoyi; aalumentu yatano naakiintu yane palandulathano

Auala okwa hogolola o ku hepekela oshigwana she - Dumeni

Eyambeko lyomudhimba gwomumbisofi Leonard Nangolo dhaAuala, 10.12.1983, mOngeleka yopaumbisofi mOniipa, olya li lya ningwa komumbisofi Kleopas Dumeni.

Oye wo okwa li a ningi euvitho lyoshituthi shoka sha gongalwa kaantu taa tengenekwa po-2000 nenge 3000. Euvitho olya ningwa pa Hebr. 11:24-27, nokwa tumbula ngaashi tashi landula:



Omumbisofi Dumeni ta popitha aayenda yoshituthi

Elalakano lyoshituthi shika shomumbisofi gwotango gwOngeleki onkwaevangeli pa-Luther yomOwambokavango, okuninga oshituthi shefumviko pamulandu gwOngeleki ndjoka okuyambeka omudhimba.

Ihe otu li wo mpaka okukolekathana meitaalo noku topolelathana shoka twa pewa kOmuwa. Pamukalo nguka, otatu idhimbulukitha wo eso lyetu yene, sho tatu ilongekidhile egaluko lyOmukulili gwetu Jesus Kristus, Omuhupithi. Otwa gongala wo okupopitha kuku Aina Auala, oluvalo aluhe, aatekulu nezimo alihe.

Otu li wo mongeleki ndjika yOngeleka ya ELOK, opo tu popithwe kaatumwa

yOmuwa mboka ya tumwa oku tu popitha, otwe shi pumbwa. Oshoka otwa kanitha ependa meitaalo meyakulo lya ELOK nolyoshigwana ashihe shaNamibia.

Oshigongingeleki shomilongo hetatu nayimwe, onda li nde mu hokolola ngeyi: "Manga inee hokolola ehokololo lyandje, onda hala okugandja epandulo kaawilikingeleki ayehe ya tetekele ndje. Otandi pandula Ehanganotumo lyaSoomi sho lya longo okuza 1870-1954, uuna Ongeleki ya tokola eipangelo lyayo moshigongi shayo shomumvo ngoka. Otandi holola epandulo omolwaawiliki yOngeleki ayehe ya kala po omimvo 24 okuza 1954 sigo 1978 moka tatu tameke ehokolo ndika.

"Unene onda hala okuholola epandulo lyandje komutetekeli gwandje, omumbisofi gwotango gwa ELOK, dr, Leonard Auala. Otandi mu pandulile omakwatho ngoka a kwatha ndje nago moshilonga oshihe. Otandi ya pandula oyo na kuku Aina Auala, omolweyakulo lyawo enene newanawa mu ELOK. Onde ya luku ngeyi:

"Eeno, oyo omagano ga ELOK. Nonando ndi itaala shili kutya Jesus omukwathi gwandje nomuwiliki gwOngeleki opo e li, otandi shi hempulula mpaka noluhodhi nena; onda kuthwa omukwathi gwandje."

Otwa gongala wo okupandula Kalunga sho kwa li e tu pe omagano ge omawanawa. Otwa li twe mu pewa ethimbo lyu uthwa. Otatu pandula Kalunga sho e mu kwatha mekondjo lyeitaalo sigo a hulithile meitaalo muJesus Kristus Omuwa. Onke twa gongala ngeyi kumwe tu imbe ekandanga lyesindano, sho Leonard Auala a likola omwenyo gwaaluhe.

"Omwenyo gwandje oKristus, nokusa okwo elikolo" Fil. 2:

Ooitaali otaa likola omwenyo. Otandi galukile koohapu ndhoka nda lesa. Hebr. 11: 24-27 oohapu ndhika odhandje mwene. Odha guma omwenyo gwandje neithano

Iyandje. Osho nda li nda hempulula mehogololelwo muuwilikingeleki lwotango omumvo 1973 nolutiyali 1976 naasho nda hogololelwa moshilonga shika 1978. Onda tile ngeyi:

1. Neifupipiko, otandi vulika kehogololo lyOshigongingeleki, opo ndi hepekwe pamwe naantu yaKalunga. Oohapu ndhoka odha kwatha ndje sho nda dhimbulula omutetekeli gwandje, ngoka tandi mu luku "omagano ga ELOK", tate Auala, kutya; Oshilonga sheyakulo, osho oshiyapuki. Osho okutokola, okuzimina, okuhepekwa pamwe naantu yaKalunga. Ovelise ndjoka nda lesa, oya ti: Okwi ihogololele okuhepekwa pamwe noshigwana shaKalunga, shi vule okunyanyukilwa uulunde wokathimbo.

Iinima yimwe moshilonga shuumbisofi, otandi dhimbulukwa, nakusa nguka ta lala moshiketha, omumvo 1963 pehala ndika, okwa lombwelwa komumbisofi Gulini; Omushigakano nguka u na oku gu zala aluhe, ethimbo ndjoka u li moshilonga u na omwenyo.


Ngashingeyi otamu mono omushigakano nguka ogu li ngashingeyi kelandulathano. Kagu li we mothingo yomunashilonga, ihe oshilonga osha kala okukondja nokulonga, opo uukriste u na omwenyo u kale tau pangele-notau taandele.


Omumbisofi koshipala shepangelo

Onke tseni Aaelok, oonzapo moshinima shino. Ethimbo a kala moshilonga shuumbisofi omiyalu dhiilyo yOngeleki ndjika odha li 156,000. Ngashingeyi sho a hulitha odha kola 300,000.

Tala kep. 3

Omumvo 1978 Ngoloneya Ndjayi gwotango gwa SWA manga inaa tameka iilonga ye nokutota po ooveta oondhigu ndhoka tadhi thelekenya ngashingeyi aakalimo yomevi ndika, okwa kundathana nomumbisofi Auala pombelelwangeleki pOniipa. Methano ndika omumbisofi kolulyo ota monika ta fatulula iinima yimwe nomupangeli ota pulakene.





Aasita ya ELOK otaa monika methano ndika ya thikama kombinga yokolulyo, pethimbo ndyoka omumbisofi Dumeni te ya popitha ya dhiginine oshilonga shawo, moka oyendji yomuyo ya yapulilwa mo kunakusa. Kolumoho lwethano ndika, ongundu yaakwashituthi mOngeleka yaNiipa nomuselekadhi ta kuutumba pokati kaatumwa yaali, endhindhiliko lyaathikamneni yanakusa.

Oshitiyali, omumbisofi pamauthompango oye omupopili gwOngeleki montaneho yaa-pangeli noyOngeleki oonkwawo. Oshilonga shika okwe shi longo nuudhiginini noneitaalo. Ngele tandi eta mpaka iholelwa iyali:

Otandi dhimbulukwa, esiku 18 lyaAguste 1971, okwa shangele omupangeli gwaSuid-Afrika, omusamane Vorster a ti:

Omusimanekwa, otandi ku shangele ombapila, oshoka otwa humbata oshinakugwanithwa shiilyo yomagongalo getu osho wo oshinakugwanithwa shaapangeli yetu pa-Hesekiel 3:17 ya kumagidhila edhina lya-ndje. Oshinakugwanithwa shoka, Ongeleki oye shi pewa kumwene gwOngeleki Jesus Kristus.

Uukumwe wOngeleki dhetu, owa kankamekelwa kuukriste. Tse yamwe muKristus, onke epangelo nali longekidhile ondjila yuukumwe noyeipangelo lyoshilongo shika. Oshiholelwa oshikwawo: Opa li pwa hololwa omadhiladhilo aatumwa ya tidhwe mo moshilongo shika. Okwa li a shangele epangelo eti 23.1.1969 ta ti:

Otandi indile epangelo li zimine aatumwa Aasoomi ya kale moshilongo. Aailongi yetu ya zimininwe ye ki ilonge pondje, opo tu mone aayakuli yaputudhwa nawa. Natu zimininwe tu kale nosikola yetu Oshigambo, opo tu putudhe aantu yetu. Moosikola dhepangelo mu langekwe aasita opo aagundjuka yetu ya silwe oshimpwiyu koomwe-nyo.

Omadhiladhilo ngaka opo ga kala nosho ge li sigo onena notaga tsikile. Ano, otamu shi dhimbulula mpaka, aalilasa aaholike, kutya okwa kala noshimpwiyu shomuntu aguhe, ngaashi sha tumbulwa.

Ihe elaka ndyoka li li moohapu ndhoka nda lesa, unene ovelise 27. "Mokwiitaala, okwa thigi po Egipiti, ye ina tila ondjahi yomukwaniilwa, oshoka a fa a tala ngoka kee lwetike, nkene a kola."

Ehungomwenyo mombete ye yuuwehame

Ina tila. Elaka ndika otandi li mu etele nena, tu taleni oshiholelwa, tu ilongele ko. Omuyakuli gwOmuwa okwa kala mekondjo nomeyakulo lyOmuwa sigo opeso lye. Okwa pilamene omanyanyu guuyuni, nesimano. Okwa zimine opo a hepekwe naantu yaKalunga.

Ina tila, oshoka a tala ngoka kee lwetike, oye Kalunga nOmuwa Jesus Kristus onkee a kala a kola. Okwa kala nokudhiginina nokutalela kuJesus. Osho she mu kwatha opo a kale omuwiliki a kola. Opo a kale omusita a kola nokukala omukriste a kola sigo opeso lye. Otandi gandja oonzapo.

Okwa lombwele aataleli po ye: Uunkundi mbuka u li kolutu lwandje, inau kwata ndje

komwenyo. MuNovomba nuumvo pehulilo, onde mu pula sho twa kundathana naye iinima yokomwenyo.

Owa popile ngeyaka, osho tuu u li sigo onena? Okwa yamukula, inandi lunduluka sigo onena. Uunkundi mbuka inau kwata ndje komwenyo. Okwa tsikile ko; ondi na omuhungimwenyo gwandje, iinima yokomwenyo oya yela. Katu na sha pokati ketu nOmukulili gwandje.

Omatumbulo ngaka otagu ulike, olutu ndoka lwa li talu ehama, olwa sa otalu lala ngashingeyi moshiketha mpaka. Ihe omwenyo inagu sa, oshoka kagwa li tagu ehama. Oshili oyo ndjoka kutya:

Dhimbulukweni aakuluntu yeni, mboka ye mu uvithile oohapu dhaKalunga, holeleni eitaalo lyawo. Hebr.7:12 Mpaka ope na oshiholelwa oshiwana. Otandi endulula ngeyi; Ina tila, oshoka a tala ngoka kee lwetike, onke a kala a kola, meitaalo.

Elaka ndika tandi eta olutiyali mpaka olyo elondodho. Eso ndyoka lye tu gongaleke

nena mpaka olyo elondodho komuntu kehe. Omanyanyu guuyuni otaga kala okathimbo.

Ihe elaka ndika tatu pulakene otali lalakane okutsa omukumo nokukoleka eitaalo lyetu nena.

Omahekeleko komuselekadhi nezimo

Otandi taalele kungoye kuku Aina Auala noluvalo lwoye, aatekulu nokezimo, Ongulu ndjino sho yu udha meni nopondje aantu ya zi meni lyoshilongo nopondje. Oku na oyendji mboka ya zi kokule nopopepi, ye ya ye ku tse omukumo.

Otandi mu tsu omukumo: Dhiginineni eitaalo muJesus Kristus. Eitaalo nohole okuholathana mokati keni koshipala shaKalunga. Nombili yaJesus nayi mu kalele yo nayi mu mangele kumwe sigo aluhe. Ombili yaKalunga ndjoka yi vule uunongo auhe, nayi kale nane.

Otandi mu pandula wo sho mwa li mwe mu yakula nawa sigo opehulilo. One aasita

amuhe naayakuli amuhe mu li mo. Mehala lyotango otandi popitha aasita Aaelok tzeni mboka twa gumwa koshinima shino osho wo otandi kwatele mo aauvithi ayehe yevaangeli.

(Pompito ndjika Omumbisofi Dumeni okwi indile aasita ayehe mu ELOK ya thikame omumbisofi Dumeni nokwa tumbula:)

"Omwaalu gwetweni aasita aaholike, ogwa yambekwa nogwa yapulilwa moshilonga kwaanguka a hulitha iilongayakulo. Sho tandi popitha aasita Aaelok ayehe naasita yalwe naawiliki ayehe yalwe pamaithano geni, otandi mu dhimbulutha oshiholelwa shooyakwetu.

Moses okwa hepekwa nokwa makele omahepeko gaKristus, osho twa lesa. Moses okwa hogolola ondjila tayi fala momahepeko, shi vule okuhogolola uupu nokukala menyanyu nenge mesimano lyokathimbo.



Okuza koshigumbo, oshiketha oshe ende pokati komukweyo omule gwaantu. Methano ndika otamu monika omukweyo gwaasita ya ELOK ya tegelela oshiketha shomudhimba shi pite po.

tango osheeli Maria-Iyaloo nosho tuu, niitenya yanakusa ihetatu.

Omuvalwa omutimulongo, Rehabeam Katengela, omutiheyali palandulathano lyokuvalwa kwawo, okwa adhikwa e li natango keilongo kuAmerika nolina wapa okukala moshituthi.

Konima yosheendo shaavalwa, okwa landula ihe aakwanezimo, aayenda ayehe ya simana ya zi pondje yaNamibia noyomeni. Etaku landula ihe oshiketha shomudhimba sha humbatwa kaasita yahetatu ya ELOK.

Oshiketha osha landula omumbisofi gwa ELOK pamwe naayakuli ye, e taa landulwa kaasita ayehe ya ELOK ye li momizafo dhawo dhoshilonga omiluudhe pamwe naasita yOongeleki dhilwe wo ya holokele moshituthi. Konima lela okwa landula oshigwana ashihe.

Oongeleka moka oshituthi shika sha ningilwa oya vulu ashike okuyakula aantu 900 lwaampoka. Yalwe mboka taa tegenekelwa peyovi 1500, oya landula ashike oshituthi shoka kekwatho lyombako.

Emoniko enene lyoshituthi olya li tali leshwa miipala yaantu molupe lwehambelelo nolwepandulo mwaashihe shoka nakusa omu-

mbisofi a ningile Oongeleki noshigwana shaNamibia.

“Okwa li e na oku tu thiga po nale, ihe Kalunga okwa li e tu mu galulile, opo e tu yakule natango lwahugunina. Ngashingeyi okwa mana iilonga ye. Otwa pandula shili,” osho omukulupe gumwe a hokololele omunyoli sho ta dhi-mbulukwa natango oshiponga shekandomo lyomumbisofi konima yomimvo odhindji dha piti po.

Aayenda mboka ya dhana pamwe na ELOK, oshituthi shefumviko lyomumbisofi Auala

Eso lyomumbisofi olyo oshiningwanima lela shopahistoli mOongeleki nomuNamibia alihe. Olwotango Oongeleki tadhi kanitha omuwiliki pamukalo nguka, okuza sho dha valelwa muNamibia komahanganotumo gomuEuropa.

Olwotango wo efumviko lyomumbisofi omuwilikingeleki lya hili aayenda yomuuyuni wopondje opo yi ikwatakanithe noluhodhi nduka palutu wo.

Ehanganotumo lyaSoomi, moshituthi shika olya kalelwa po komusita Seikku Paunonen. Ihe oshituthi osha li sha kalelwa po kOongeleki adhihe oonkwaLuther muuyuni.

Shika osha ningwa sho Amushanga Ndjayi gwOngongahano yAakwaluther, Carl Mau Jr. a mono ompito yokukala mo nokugandja omakundo medhina lyOongeleki adhihe dhi li mehanganano ndyoka.



Oshiketha shomudhimba otashi falwa mOongeleka nosha kwatelwa komeho komumbisofi Dumeni naayakuli ye.



Okuza koshigumbo, oshiketha oshe ende pokati komukweyo omule gwaantu. Methano ndika otamu monika omukweyo gwaasita ya ELOK ya tegelela oshiketha shomudhimba shi pite po.

tango osheeli Maria-Iyaloo nosho tuu, niitenya yanakusa ihetatu.

Omuvalwa omutimulongo, Rehabeam Katengela, omutiheyali palandulathano lyokuvalwa kwawo, okwa adhikwa e li natango keilongo kuAmerika naina wapa okukala moshituthi.

Konima yosheendo shaavalwa, okwa landula ihe aakwanezimo, aayenda ayehe ya simana ya zi pondje yaNamibia noyomeni. Etaku landula ihe oshiketha shomudhimba sha humbatwa kaasita yahetatu ya ELOK.

Oshiketha osha landula omumbisofi gwa ELOK pamwe naayakuli ye, e taa landulwa kaasita ayehe ya ELOK ye li momizalo dhawo dhoshilonga omiluudhe pamwe naasita yOongeleki dhilwe wo ya holokele moshituthi. Konima lela okwa landula oshigwana ashihe.

Oongeleka moka oshituthi shika sha ningilwa oya vulu ashike okuyakula aantu 900 lwaampoka. Yalwe mboka taa tegenekelwa peyovi 1500, oya landula ashike oshituthi shoka kekwatho lyombako.

Emoniko enene lyoshituthi olya li tali leshwa miipala yaantu molupe lwehambelelo nolwepandulo mwaashihe shoka nakusa omu-

mbisofi a ningile Oongeleki noshigwana shaNamibia.

“Okwa li e na oku tu thiga po nale, ihe Kalunga okwa li e tu mu galulile, opo e tu yakule natango lwahugunina. Ngashingeyi okwa mana iilonga ye. Otwa pandula shili,” osho omukulupe gumwe a hokololele omunyoli sho ta dhi-mbulukwa natango oshiponga shekandomo lyomumbisofi konima yomimvo odhindji dha piti po.

Aayenda mboka ya dhana pamwe na ELOK, oshituthi shefumviko lyomumbisofi Auala

Eso lyomumbisofi olyo oshiningwanima lela shopahistoli mOongeleki nomuNamibia alihe. Olwotango Oongeleki tadhi kanitha omuwiliki pamukalo nguka, okuza sho dha valelwa muNamibia komahanganotumo gomuEuropa.

Olwotango wo efumviko lyOmumbisofi omuwilikingeleki lya hili aayenda yomuuyuni wopondje opo yi ikwatakanithe noluhodhi nduka palutu wo.

Ehanganotumo lyaSoomi, moshituthi shika olya kalelwa po komusita Seikku Paunonen. Ihe oshituthi osha li sha kalelwa po kOongeleki adhihe oonkwaLuther muuyuni.

Shika osha ningwa sho Amushanga Ndjayi gwOngongahano yAakwaluther, Carl Mau Jr. a mono ompito yokukala mo nokugandja omakundo medhina lyOongeleki adhihe dhi li mehangano ndyoka.



Oshiketha shomudhimba otashi falwa mOongeleka nosha kwatelwa komeho komumbisofi Dumeni naayakuli ye.



Nguka okwa adhika moshigongi shAakwaluther ayehe yomuAfrika, shono sha gongalele muHarare shaZimbabwe uule wiiwike iyali pokati kaDesemba gwa zi ko.

Elalakano lyoshigongi shoka, okulongekidha oshigongi shaayehe shAakwaluther muuyuni tashi ka kala ko 22 gaJuli sigo 5 gaAguste nuumvo muBudapest, Hungary.

Okuza moshigongi muHarare, Amushanga Mau, okweetelela mondjato ye ombilive yehekeleko komuselekadhi, kuku Aina, koothigwa, kezimo nokOngeleki ayihe ya ELOK. Ombilive oya shainwa kaawili-kingeleki 55 yOongeleki oonkwaLuther muAfrika alihe manga ye li moshigongi shoka.

Eso lyaNangolo dhaAuala, kali shi ashike ekanitho kOngeleki ya ELOK, ihe okuuyuni auhe, shoka osho sha kala tashi holoka momatumwalaka gomokana, goombilive nenge moondelekelama.

Pamwe naMau, okuza muHarare, okwe ende pamwe nomumbisofi Daniel P. Rapoo omumbisofi omukuluntu gwOngeleki onkwaevangeli ya hangana mu S. Afrika noye wo ngoka e li omupresidende gwa FELKSA; Hedrik Frederik omuwili-kingeleki gwOngeleki onkwaevangeli paLuther mUushimba osho wo Christa Held, amushanga mombelwa yomakwatho mOngongahangano yAakwaluther, mu-Geneva.

Mbaka mokushuna kwawo, oye endele pamwe nomumbisofi gwaELOK, K. Dumeni ngoka naye wo e na okukalela po Ongeleki yetu moshigongi shoka shaHarare.

Meme Hilja Shivute okwa adhikwa a tetekele manga omutonatelishitayingeleki shuuninginino, omusita Matti Amadhila inaa pewa eziminino kepangelo lya SA.

Omatumwalaka gomahekeleko oga zile wo kEhanganotumo lyomuNdowishilanda; kegumbo lyaOlle Eriksson kuGeneva; kOngeleki oonkwaLuther dhomuAmerika; kOngeleki onkwaLuther yomuSweden nokOngeleki yaKatoolika kaRooma muNamibia.

Aayenda yomeni lyoshilongo

Pokatilela kethano ndika, omumbisofi Dumeni ota monika te ya ta piti pokati komikweyo dhaasita yu uka mongeleka, elongelokalunga li tameke.




Omusita Carl Mau gwOngongahangano yAakwaluther muuyuni ta popitha oshituthi

Meni lyoshilongo Ongeleki tadhi landula, odha li dha kalelwa po wo kaawiliki yadho: Ongeleki yaAnglikan muNamibia komumbisofi gwayo James Kauluma; Ongeleki yaKatoolika kaRooma kuPata gwaKatana Houben; yaAfrican Methodist Escopal ku E. Tjirimuje nOngeleki yaEnglanda muNamibia kuPieter Kalangula ngoka a kalele po wo nepangelo lyOwambo.

Okuhokolola uule woondunge nowomagano gaAuala gokukalathana nomuntu kehe, kashi shi oshinima tashi vulu okutulwa komuntu miitya nuupu, ihe okukutha ko owala uupambu umweumwe. Aapopi ayehe oshe ya nyenge nonando ye shi halele.

Shoka ashihe ye shi vulu nosho sha simana, ayehe oya gandja esimano kuKalunga ngoka a shitile omulumentu ngoka nokwe mu gandjele mokati ketu ethimbo lya yeleka ongoshilongitho she.

Amushanga gwO mukwetu



Omuselekadhi Aina Auala methano ndika, omutiyali okuza kolulyo komeholela yu uka mOngeleka yaNiipa meyambeko lyomudhi-mba

EHOKOLOLO LYOSHITUTHI SHEFUMVIKO MOMATHANO



Pata Houben ta popitha oshituthi



Auala okwa ningi “omupopili gwetu” megulū: — R K.

Aamwameme yOngeleki yaKatoolika kaRooma, nayo wo oya li ya holola oluhodhi lwawo omolweso lyomumbisofi Auala. Pata Houben gwaKatana ngoka kwa li a mono ompito yokuthika moshituthi shefumviko okwa li a kundu oshituthi ngeyi:

Ne yOngeleki ya ELOK omwa kanitha omumbisofi gweni, ihe tse Aakatooolika otwa kanitha kuume ketu omudhiginini. Okwa konga ehanganano pokati kaakriste ayehe nokutse wo nonando Ongeleki yetu onshona.

Tse atuhe otatu tegelele eyo etiyali lyaJesus. Omumbisofi Auala okwa thika nale. Uuyuuiki we, uudhiginini we nethimbo lyetegelelo lye lya hulu po. Okwa thika ngashingeyi meadhimo lyaana yaKalunga, moka ta ningi omupopili gwetu.



No. 1 - Methano ndika, engathithi lyaantu oli li momukweyo poshigumbo, opo li tale oshipala shanakusa, manga elongelokalunga inaali hita

No. 2 - Omuselekadhi kuku Aina ote entamene lwahugunina oshipala shomuholike gwe ta lala moshiketha. Kolumoho lwe, okwa yambidhidhwa komupangi A-L.Hirvela. Onkelo ye Toivo ota monika konima yawo te ya tongolola.

No. 3 - Methano ndika, omusita Seikku Pannonen, ta tenteke ongala yEhanganotumo lyaSoomi kombanda yoshiketha shomudhimba, sho a mana okweeta ekundo lye mOngeleka.

Okwa hepekwa pamwe noshigwana she

Dha za kep. 3

Osha yela aayakuli aaholike, unene aasita ya ELOK, kutya okuhogolola okuhepekwa omolwevaangeli shi vule okunyanyukilwa okathimbo miinima ya puka. Shikonekeni kutya, Kalunga ngele ta gandja oshilonga komuntu gwe omunkundi ngaashi ndi li notu li, ote mu pe wo oonkondo oku shi humbata.

Kalunga ngoka e ku pe oshilonga sheuvitho lyevangeli, miigwana yetu, oshilonga shewiliko, oshilonga sheyakulo lyaantu ye, oye Kalunga ngoka e li olunza lwoonkondo dhoye sigo opehulilo. Kaleni mwa kola'', osho epopitho lya li po ngeyi kaasita.

Aayakuli otandi mu tsu omukumo kutya, Kalunga ina ninga nale epuko noita ka ninga epuko, opo a gandje oshinakugwanithwa komuyakuli gwe, e te mu etha, aawe. Ite shi ningi nando. Tu taleni kuye, opo tu kale twa kola.

Ina tila, oshoka a fa e lwete Jesus ngoka itaa monika nomeho gokomutse, ihe gomeitaalo, onke a kala a kola methimbo edhigu molugodhi, moluhodhi monkatu kehe mondjila yeyakulo lyaantu yaKalunga. Pailongaitha-na yetweni atuheni Jesus ota ti:

Ashihe otashi hulu po mbala

Ongame ondi li pamwe nane omasiku agehe sigo ehulilo lyuuyuni. Osha ningwa naateteki yetu, sigo onaLeonard Auala nguka ta lala moshiketha mpaka nena. Osho tashi kala sigo aluhe. Opo mpaka aawiliki naasita naayakuli pu na omukumo gwetu nenyanyu lyetu noonkondo dhetu.

Kaalilasa amuhe, oshigwana oshiholike nookuume amuhe, otandi dhimbulutha: Ethimbo efupi 1Kor.7:27 Omanyanyu guuyuni otaga kala okathimbo. Omaluhodhi wo ogethimbo efupi, Okuhepekwa wo ngele konkalo yoshilongo shetu nokomaudhigu nenge kuudhigu mboka u na, otatu kala okathimbo. Aawiliki mboka tu ya na moOongeleki dhetu, otu ya na okathimbo.

Naamboka taahepeke aantu yaKalunga nayo itaa kala sigo aluhe. Omuntu gwaKalunga monkalo kehe, menyanyu nenge muudhigu, otaa pungulula iipala yawo ya taalele kuukwaaluhe yo ya kale meitaalo puJesus ngoka ta kala aluhe.

Eso ndika nomaso gooyakwetu ayehe, otaga uvitha, ethimbo efupi, onke ookuume, onawa ngele otatu dhiladhila nawa shili, manga tu na ethimbo. Okwiitedhulula nokutaalela Jesus twaa wulwe notwaa gwile muupika uulunde woludhi kehe, opo tu thike melago nomenyanyu lyaaluhe.

Omumbisofi Auala pehulilo mpaka muDesemba inapu pita iwiike, otwa li twe mu i-



Oosestela dhaShikuku naKatana ndhoka dha holokele moshituthi shefumviko pamwe naPata Ruben, yaali yomudho otaa tula oongala kombanda yoshiketha shomudhimba.

mbile eimbilo ndika 491; Jesus ou nghi mu efa po. . . . Pehulilo okwa ti ngeyi:

“Ondi lwete meimbilo ndika omu na iinima iyali;

a) omuntu oku li mekondjo nomuudhigu, ota mono Jesus. Ota ningi etokolo, Jesus nguka itandi mu etha po.

b) Patiyali, ondi lwete omuntu ota tsakanene naJesus mondjila Omuntu ota ti:


Jesus nguka otandi yi naye, otandi mu kwata, opo tu ye naye, itandi mu etha po. Okwa ti omadhiladhilo gamwe ga nyenge ndje.

Oshituthi shika osha hāla okuulika olunza lwoonkondo dhetu muudhigu wokathimbo kutya, olwo eitaalo alike. Okutaamba omauvaneko gaKalunga ge li moohapu, osho wo okwiigandja kuKalunga. Okupilamena ashihe shuuyuni nokutaalela meinekelo lyoshili ngoka kee lwetike opo tu kaleni twa kola meitaalo.

Eitaalo ndika oli li po olunza lwoonkondo dhetu, otatu lu pewa mokuuva nomokutamba oohapu oondjapuki dhaKalunga, osho wo omeho getu ga kale ga taalela omutameki nomugwanithi gweitaalo, oJesus ngoka i idhidhimikile omusigakano omolwenyanyu ndyoka lye mu pungulilwa, nolye tu pungulilwa.

Eitaalo ndika lyokwiitaala edhimepo lyoondjo, lyi itaala meyumuko lyaasi lyokwiitaala omwenyo gwaaluhe oko gu li, olyo alike ondjila. Olyo alike opaspoorta tayi tu pitha moshiponga shoshilongo sheso, tu ye momwenyo gwaaluhe. Ihe otii mu dhimbulutha natango:

Olunza lwe olwa li mpaka; ina tila, oshoka meitaalo okwa fa a tala ngoka kee lwetike, onkee a kala a kola. Natu kaleni twa kola meitaalo lyomuJesus Kristus Omuwa.



Rehabeam-Katengela Auala, omutiheyali palandulathano lyokuvalwa ngoka inaa mona ompito yokukala moshituthi shefumviko lyahe omolwokutaamba onkatu mosikola yokombanda yaOhio, muAmerika eti 16.12.1983. Okwa hokana noye na omunona gumwe.

Ethano olya thanekwa pethimbo lyoshituthi shonkatu yotango B.A. mosikola yokombanda mu SA.


EHISTOLI LYOMUMBISOFI AUALA MOMATHANO



Aathikameni ya Leonard; Oskar Tylväs na Hilma Tylväs, kolumoho, osho wo aaputudhi aakwawo Suoma Terho na Hilma Kupila kolulyo



Yina ya Leonard, kuku Loide ya Shikongo, ngoka e li mefano esiku limwe okwa li a galikana ngeyi: Omuwa Kalunga, ngele to tu pe okamati, otandi ke kupe ka kale koye mwene. U ka longithe shaashoka wa hala nou ka tume shaampoka wa hala.



Omusita Leonard sho a yapulilwa oshilonga nokwa langekwa megongalo lyaandjawa, Oniipa 1958.



Leonard Auala na Aina moshituthihango shawo 11.11.1935

Ehokololo lyomuhungi pombete yomumbisofi Auala

Tate nguka ta lala mpaka a mwena thilu, okwa humbata uuwehame ethimbo ele, okuza petameko lyomumvo 1983 sigo esiku etine 4/ 12/ 1983 uuna uuvu wa aluka.

Oyendji omwe shi koneke sho mwe tu talele po kegumbo, nokutsakanena naye mpeya naampeyaka nomoshipangelo moka a kala oomwedhi mbali nomasiku gamwe.

Okamati koomvula 21, Leonard ya Auala, manga e li mOseminali yuulongi mOniipa.



Meme Aina okwa pewa omukumo neinekelo okuhunga omuholike gwe muuwehame womumvo guudha. Okwa ningi ashihe shoka ta vulu okukwatha omuholike gwe:

1. Okuhunga omwenyo
2. Okupalutha olutu
3. Oku mu dheula a mone oonkondo.

Mokuhunga tate, oya longo mekwatathano limwe nomundohotola N. T. Hamata. Tatekulu Hamata okwa longo oshinakugwanithwa she ngomundohotola nongomukwanezimo.

Mokutalela po tate kegumbo nomoshipangelo, okweeta wo iipalutha iitungitha yolutu.

Ngaashi wo egumbo lyatatekulu Amaambo olya kutha po oshitopolwa shokupalutha tate naayakuli ye sigo opehulilo.

Kalunga ngoka hu uvu onkugo yepongo okwe tu tumine omupangi omuyakuli gwa tate.

Okwa yakula tate ethimbo alihe uusiku nomutenya kee na ezimbuko, oye omutumwa meme A-Liisa Hirvela.

Etokolo neigandjo lya meme A-Liisa okuyakula tate olya gandja omukumo kumeme Aina nokezimo alihe kutya, otatu taamba shoka tashi zi meke lyaKalunga, oshoka osha zi kohole ye.

Ngame otandi pandula Tate Kalunga sho nda mono ompito okuyakula tate paunamiti nongomuvalwa.

Otwe shi koneke pamwe nameme A-Liisa kutya, tate ota pumbwa eyakulo unene uusiku, omutenya hwepo ngaa. Onkene okwa tokola tu kale atuhe uusiku putate, nomutenya tu paathane omalufu okukotha ootundi dhimwe.

Tala kep. 9



Efano ndika tate nameme Auala oya thanekwa 1963, konima yetokolo lyOshigongi-ngeleki a ninge omumbisofi gwtango gwOngeleki ya ELOK.



Omumvo 1963, omusita Leonard Auala okwa yapulilwa oshilonga shuumbisofi wotango mOngeleki ya ELOK.



Toivo, onkelo yanakusa

Tate okwa kala nomadhiladhilo ga yela nando a kala muuwehame unene. Okwa dhimbulukwa iinima, omimvo, omadhina, ongeleki, unene pethimbo ndika. Okavango okwe ka galikanene melaka lyawo.

Ngaashi shi nokukala, otwa dhimbulula megumbo kutya opwa kala iinima yimwe mbyoka tate inee yi hokwa. Ihe pamathimbo ge gahugunina mombete, opo nde ke shi uva lwotango kutya ina hokwa nande elongitho lyoondjembo nando pakupopya kwe ota ti oyana naatekulu otaa vulu ngaa oku dhi longitha poompito dhi ili nodhi ili uuna sha pumbiwa.

Omasiku gahugunina okwa ithana meme Aina noya galikana pamwe olwindji okwiindila edhimopo lyoondjo nokuhambelela Kalunga.

Esiku ekwawo okwa lombwele meme A-Liisa e tu ithane mbala aanegumbo opo tu imbe nokugalikana pamwe, nosho twa ningi.

Moshiwiki shahugunina okwa lombwele ndje: Meme Lugodhi, lombwela oludhi aluhe lwaAuala kutya ekwatathano olya kala pokati ketweni okuza petameko nali tsikile sigo opehulilo! Lombwela tate Nambahu ngele e ya na nyole oshinima shi, oshoka oshoopala unene."

Okwe tu lombwele wo opikiniki, nomuwiliki gwayo o-tatekulu Gerson Shipuata. Tate okwa indile kaa pewe iilonga yasha pethimbo lyopikiniki kakele okunwa omeya omatalala nokuyola. Okwa tameke okwiimba eimbilo ndika:

"Sipi sikonyisa vali, ava va kolela Jesus". Otwe li imbi atuhe yatatu, tate, meme nangame.

Maria-Iyaloo, osheeli shegumbo lyaAuala.



Uusiku umwe okwiigidha ta ti: "Salmon, Salmon, londa pombanda imbeni mokule Hosiana."

Esiku 3/12/1983 sho twa li twa gongala puye nokwiimba okwa ti: "Elongelokalunga noshituthi shUulalelo Uuyapuki."

Konima okwa indile tate Shipena e mu yakule mUulalelo Uuyapuki Okwe shi ningilwa komatango gesiku ndyoka, nokwa ti: "Ombepo Ondjapuki".

Aakuaawala na meekulu Aino Dumeni otwa kala uusiku auhe popepi nondjugo ndjoka. Omundohotola gwe tatekulu N. T. Hamata okwa ningi ashihe shoka ta vulu.

Potundi ontilyali yuusiku, meme A-Liisa okwa zimine atuhe pamwe na meme gwetu tu kale popepi lela nombete yatate. Otwe yi kunduka, omanga meme a kwata moshikaha sha tate ngotaa minike.

Otwa imbi omaimbilo unene tuu eimbilo ndyoka lya kala li holike ku tate: "Kalunga tii ku hambelele". Otwe li imbi olwindji.

Otwa dhimbulula oshipala shatate sha ludha, sha pusha e li mekondjo edhigu, ihe nando ongawo otwa mono omukumo gwokwiimba "Kalunga tii ku hambelele".

Manga otundi ontine inaayi dhenga, oshipala shatate osha yele tashi adhima. Potundi ontine koongulasha okwa fudha muule nokwa kotha po. Tate ngashingeyi okwa aluka.

Tse oohigwa otse mbaka. Ehambelelo lyaa ninge lyetu ihe olya Kalunga.

Katrina Auala

Ehokololo lyomuhungi

Dha za kep. 8

Ayehe mboka ya talele po tate mombete oye mu etele omulungelo gwokupalutha omwenyo.

Nesimaneko, aakwanezimo atuhe otatu pandula Bishop Dumeni ngoka a ka tokola okuninga owandaha yongula kehe putate moshipangelo uuna kee li moma-lweendo ge. Tate ye mwene okwe shi holola aluh-kutya oshoopala unene okulesha nokwiimba nokwe-ndulula aluhe, oshoka otashi koleke omwenyo.

Ondjugo ndjoka a li mo oya kala kuye eha eyapuki. Tate mwene okwa galikana uusiku nomutenya. Okwa indile ealudho, oonkondo dhi gwedhelwe, ihe aluhe okwa gwedhele ko: "Ehalo lyoye nali gwanithwe."

Okwa galikanene aaholike ye, unene meme Aina oyana aatekulu, aakwanezimo, iilyo ayihe ya Elok, tatekulu na meekulu Dumeni aatumwa nomuntu kehe gwolu-dhi kehe, pomahala agehe mpoka e ende.

Moonkundathana dhawo naKalunga okwa pandula sho a li a pewa oshilonga. Okwa zimine kutya Kalunga okwa dhimbulula kutya oshilonga okwe shi mana nokwe mu zimbula musho. Ihe oya kundathana megalikano kutya ngele opu na gumwe ngoka a dhi-mbulula kutya ina mana oshilonga, ota popi pantu.

Oshe tu kumitha nameme A-Liisa sho ha ti: "Tandi tala iikumitha ya Kalunga te yi ningile ndje."

Olwindji meme A-Liisa okwa kuutumba popepi nombete ye, nokwe mu pula: "Tatekulu okwa ethiwa?" Okwa ti: "Otu li yatatu, Jesus ngoye nangame."

Okwa ti wo kumeme A-Liisa: "Aantu naa dhiginine eitaalo lyawo ethimbo kehe ndyoka ye li na. Naa kale ye nombili naKalunga nombili naantu ooyakwawo." Okwa ti ishewe kuye:

"Onda hala okuhulitha." Meme A-Liisa okwe mu yamukula: Tatekulu oku li miikaha yaKalunga, ota ilwa pethimbo lyoopala. Tate okwa yamukula: "Eeno ota-ndi shi tseyu."



Omumvo 1979, omumbisofi Auala, omushigakano gwe gwopashilonga okwe gu gandja komulanduli gwe moshilonga, omusita K.Dumeni, manga ye (Auala) ta yi moshipundi shevululuko.

Okugama ombinga kayi na Kalunga, oshiponga

Okukalamwenyo kwomuntu okuudha omahogololo, okuza petameko lyeshito. Omolwashoka katu li moshilongo shimwe, katu li pehala limwe. Miilongo ayihe muuyuni sigo onena, otamu hiywa omahogololo ga lukwa nokuli ogaayehe, opo ga hogolele ongundupangeli yoshigwana.

Moongeleki otamu ningwa wo omahogololo okuhogolola aambisofi naayakuli yalwe yiilonga yegongalo. Nomomahangano otamu ningwa ehogololo nenge miigongi yaagundjuka.

Aantu otaa hogolola ngoka ya hala nemanguluko. Gumwe ota pangele paudemokooli, gumwe pausosiale, omukwawo ishewe opauMarks nenge ishewe opaukayamukulwa.

Momahogololo agehe tatu ningi, onda hala okuulika kutya okuhogolola ombinga kayi na Kalunga, oshiponga. Ethikilo lyaamboka taa ende nayo, olo etakumo nuululu. Ehol.20:15.

Mateus ota nyolwa ngeyi: Otu umbilwa momilema dhopondjelela moka hamu kala elilagano neikokoto lyomayego. Mat. 25:30. Oto hogolola ombinga yini?

Ngele tatu leshe ondjokonona yoshigwana shIsrael, otatu adha olwindji okukala kwawo kwa kwatwa kiimenka. Ngele pethimbo lyaMoses omutembudhi gwoshigwana muupika waEgipiti, ngele pethimbo lyaJosua ngoka a ningi omuwiliki peha lyaMoses.

Mombuga oshigwana oshi ihogololele okuningilwa ontana yoshingoli. Olwindji aantu otaa longe iikalunga yaa na ekwatho lyasha. Elia osho i igidha moshigwana shOmuwa: "Sigo uunake tamu tengukile paali?" Oshigwana osha gama ombinga yaa na Kalunga. Naamboka ye shi ningi inaa thika mevi lyeuvaneko.

Omuna gwaNun, Josua okwa hiyi oshigwana shOmuwa noku shi ulukila ye kombinga hoka a gama ko, nokwa hala wo noshigwana shi ninge etokolo shi game kombinga ndjoka yi na Kalunga.

"Hogololeni ne yene, ngame negumbo lya-ndje onda hala okulongela Omuwa." osho a ti. Jos.24:15.

Oshitya, onda hala, osha simana metokolo lyomuntu. Tse nangoye otwa hala shike? Otwa hala okupangela? Otwa hala uupolisi? Otwa hala okudhipaga muumbotsotso?

Shoka tatu adha muMateus 6:33, oshiwana unene sho tatu kumagidhwa nekumagidho lya fa ekwawo ndika kutya: Tango kongeni oshilongo, shaKalunga nuuyuki washo, nena ayihe otamu yi gwedhelwa ko.

Ningeni omatokolo taga tsu kumwe nehala lyaKalunga, oshoka Kalunga oye awike ha gandjele ayhe nuuhokwe. Jak.1:5-6.

OSHIPONGA MONDJILA KAYI NA KALUNGA OSHASHIKE?

Tango otu shi okutala shono tashi lalakanenwa kuuyuni wethimbo lyetu, nokutya OMBILI. Ombili yuuyuni. Ihe Jesaja ota popi aakaa na Kalunga kaye na ombili. Jes.57:21.

Owe shi koneke nopethimbo lyetu, ombili otayi popiwa mokana, ihe monkalathano ya nyengana okuholoka. Osha yela kutya ombinga ndjoka twa hogolola oyoshiponga.

Aantu otaa si iipundjamenye, iiponga oyindji, aniwa ombili yuuyuni tayi kongwa notayi kondjelwa. Ombili yashili oyi li mu-Jesus amuke. Fil.4:7. Ngele shika otwe shi zimine, natu longekidheni ano ehogololo ngaJosua, opo twaa ki igidhulule ishewe ehogololo li shune mo, sho itaashi wapa we.

ONDJILA YI NA KALUNGA OYINI

Israel, ongoshiholelwa mevi lyeuvaneko ina ya mo nokapala ka yela. Ine enda mombuga a fa e li melalangali, ihe omuupyu womalugodhi omanene nogendji. Ihe omolwaKalunga omudhiginini gwawo, oya thiki. 2Mos. 14:14.

Ondjila yomushigakano oyo ondjila yetu. Mat.16:24-25. Owa tokola okulandula lye? Pamwe negumbo lyoye, landula ondjila yomushigakano noto ka thika. Ehol. 21:7-8. Hogolola nena hoka to gama.

Jonas Nd. Kambidhi.

Okwiimba kwo-musitagongalo melongelokalunga

Ku M.Kambudu

Okwiimba kwomelongelokalunga okwo kwopaMbimbeli naanaa ngaashi tashi holoka opendjipendji mEtestamendi Ekulu, unene mOmapisalmi nosho wo mundika Epe. Mat. 26:30; 1Kor.14:26; Ef.5:19; Kol.3: 16 noonkwawo.

Melongelokalunga otu na omikalo ndatu dhopakwiimba:

a) Okwiimba kwegongalo alihe oshita, kwa dhiladhilwa omaimbilo gomEhangano.

b) Okwiimba kwopamalufu, kwomusita negongalo

c) Okwiimba kwoongundulwiimbo tadhi imbi ookuwolo.

Okwiimba akuhe nkuka, otaku tungu egongalo, okuthikithilathana onkundana yenyanyu, elaka

lyehupitho muJesus Kristus. Tu taleni pafupi lela okwiimba kwopamalufu kwomusita megongalo.

Okwa li lwopomimvo 500 sigo 600 sho omupapa omunene Gregorius ngoka pandjokonona yomusiki a ningile oshindji nomaimbilo wo ngoka goliturgi mOngeleki yotango. Pandjokonona Gregorius okwa li a gongele omaimbilo agehe gopaliturgi nokwe ga tula melandulathano, elandulathano alihe lyopaliturgi te li koleke.

Omaimbilo ngoka oga kala haga longithwa nokuninga mo sha shomalandululo omashona inaaga guma uundilili wago. Martin Luther wo omusiki ndjoka okwa kala e yi shi nawa, nokwe yi longitha; nomokuyelitha eitaalo okwe yi imbi naanaa nomolwashoka omusiki wo yetu yoliturgi Aakwaluther, oyi na omukanka gwayo momusiki yOngeleki yotango. Yo Ongeleki yotango oya thigulula kaaimbi yomOsinagoga yAajuda.

Yamwe otaa dhiladhila kutya ogo omaimbilo omapu lela, kehe Osoo-ndaha ohaga imbwa. Eeno ogo omapu shili, ihe kombinga onene nokuli, ogo omadhigu ga gwana okwiihepekelwa lela kunaku ga longitha. Uudhigu wago umwe ou li mpa:

1. Oge na etumwalaka lyoohapu dha-Kalunga ndyoka kaashi shi nando oshipu oku li eta puuyeleele nopwaa na andola eihepeko lyasha.

2. Ogopalandulathano lyOngeleki noge na okukala ngaashi ga uthwa ga kale mOngeleki ndjoka.

3. Ogo omusiki, nokuninga omusiki pamusiki, kashi shi oshipu.

4. Uudhigu ishewe owo mbu, sho hagi iyimbilwa, omusita ti imbi po oye awike.

Tu taleni oshitsa oshitine. Olwindji moondjimbo ndhoka, omusita oye ha tameke, lyo egongalo tali ka ya mo. Etameko wa tameke nalyo, olo tali utha ezimino lyegongalo kutya otali kala lya tya ngiini.

Ngele owa tameke pombandambanda, egongalo onkene tuu lye ki ileka. Ngele owa tameke peviiivi, aana inaa adha po we.

Tala kep 12

Ompumbwe yAanamibia yokumanguluka, otayi longithwa po uuwanawa wayalwe

KuSebulon Ekandjo

Enota lyAanambia lyokumanguluka miita, unene kumboka yokoshitopolwalongo shokuumbangalantu, olye ya etela epulo itaali zimbuka we, kutya oshikundathanwa shaNamibia muuyuni sha thikithwa sigo openi ano?

Shika tashi landula mpaka nonando she etwa momatumbulo ogendji ngiika inaaga pumbiwa, onkambadhala yowala yokuulika omainyengodhiladhilo ngoka twe ya nago momumvo omupe 1984.

Omumvo 1978 iigwanahangano yuuyuni (VVO) mbyoka ya humbata oshinakugwanithwa shelelwavi lyayo ndika lyuuyuni (edhiladhilo ndika SA sigo onena ote li patana), oya gandjele oshitokolitho shonomola 435, shi kale euthongodhi lyokufalitha Aanamibia ayehe mompito yokuhogolola yoyene omuleli gwawo ngoka ya hala, pauyuuki nomemanguluko.

Ngashingeyi otashi kolekwa komatompelo ogendji, kutya oshitokolitho shoka osha pungululilwa manga ponto notapu yelekelwa manga noonkambadhala dhopaumwene.

Oshitokolitho osha li sha ziminwa nawa koongundu adhihe dhi na oonkondo memanguluko lyoshilongo shika; Suid-Afrika, Swapo, iilongo itano yuuninginino niilongo yaAfrika iishiinda na SA.

Pokati komumvo gwa zi ko nopehulilo lyagwo, iigwana oyindji yuuyuni, oya kambadhala yi shune oshitokolitho shoka pehala lyasho noshi tulwe miilonga.

Osha ningwa sho ya tumine Amushanga Ndjayi gwa VVO, dr Javier Perez de Cuellar ku SA ya kundathane. Nguka okwa shuna noluhodhi olunene sho a lombwelwa kutya Namibia otali pewa emanguluko, ashike ngele Aacuba (**mboka inaa kwatelelwa mo koshitokolitho 435**) taa zi mo tango muAngola.

Konima yolweendo nduka lwaAmushanga omunene gwEhangano ndyoka lyiilongo 158, de Cuellar, oshigongi shiilongo mbyoka, osha tokola ihe okugeela SA, kaa pindike ye we niilongo yomuuyuni, sha kwatelela mo omahooli. Ye Swapo a longekidhilwe natango omakwatho gopaimaliwa. (The Star 6.12.1983).

Etokolo ndika (**nonando aantu aashona ye na einkelolo mulyo kutya otali ka gwani-thwa**), olya ningwa kiilongo 124 ya kondjithwa kiilongo 16. Iilongo itano yuuninginino, oya tindi okuyelutha iikaha yayo yi ulike hoka ya gama.

Okuza 1966 iilongo oyindji mEhangano lya VVO, oya tala sigo onena, kutya Swapo oye awike omukalelipo gwaantu yaNamibia, nosha kolekululwa natango moshigongi shoka.

Iigwana mbyoka oya tala wo kutya SA oye eimbo memanguluko lyaNamibia. Iilongo ngaashi Israel naAmerika oya pangulwa no nyanya momutumba ngoka, shoka taku tiwa

otayi longele kumwe na SA mekonomi nopaukwiita.

IIPANGO INE (4) YAAMERIKA OMOLWAAFRIKA

Iigwana yaNamibia oyo yene ya li ya dhi-mbulula ompumbwe yayo yemanguluko noya tameke oku li indila ku SA na VVO mboka aaleli yevi. Kape na ngoka kwa li e ya longo oondunge ndhika nuuthemba woku li pula oya kala ye u na.

Ngiiika aashona ngashingeyi moshilongo shetu mboka taa zimine kutya emanguluko lyoshilongo shika oli li po natango okukonga uuwanawa waakalimo. Shila owayalwe. Otashi kolekwa kefatululo lyaAmerika moka ta yelitha omulandu gwe paipango ine mbyoka a tegelela yi gwanithwe kAayaafrika.

Omutoolinkundana Gerald l'Ange, okwa nyola omatumbulo ga dr Chester Crocker gwiinima yaAfrika mepangelo lyaReagan ngaashi tashi landula:

1. Amerika ota talele emanguluko lyaNamibia sigo onena komukanka gwoshitokolitho 435 sha VVO.

2. Amerika ota tegelele (tango) ekwatathano pokati kiilongo yomuAfrika li kale li shi okwiinekelwa.

3. Amerika ota tegelele (tango) omatanga agehe omakwiilongo muAfrika (unene Afrika lyuumbugantu) ga shune kaandjawa noshi li ompumbwe yeulumo. Oongamba dhopailongo dhi simanekwe, omapangelo naantu yamo, ya wape okwiwilika nokutunga iigwana yawo yene.

4. Nelunduluko mu SA li endele ko (tango) noli tsikile komeho meinyengo ewanawa.

Paitsa ayihe mbyoka itatu ya hugunina, (**inaayi kwatelelwa mo koshitokolitho 435**), osho shoka sha pumbiwa po, manga Namibia inaali mangululwa, naAmerika shika ote shi koleke naanaa kutya oshinakugwanithwa she a mone iipango mbyoka ya gwanithwa.

EMANGULUKO OPEHULILO LYOMUMVO 1984 - FULANISA

Konima yomasiku omashona Amerika sho a yelitha omukalo gwe okulela iigwana yaAfrika, Fulanisa okwa tokola okuza mo mokangundu kiilongo itano yuuninginino netompelo kutya itaka longo we shoka ka tulilwa po.

Etokolo lye olya tetekelelwa tango komapopyo ge gopoompito odhindji, kutya

ye ita zimine we pamwe naAmerika emanguluko lyaNamibia li mangelwe kumwe naAcuba. Okangundu hoka oka thikama maanankondo yuuyuni;

Amerika, Fulanisa, Engilanda, Canada naNdowishilanda lyuuninginino noka tulilwe po 1977, opo ka kwathe SA a tule oshitokolitho 435 miilonga melongelokumwe na VVO.

Fulanisa okwa ti wo kutya ye okwiikwata unene molwonkalo yuumbugantu waAfrika unene muAngola, ndjoka a ti kutya oyokushituka iita yuuyuni. Pahokololo lyomutoolinkundana James Tomlins, Fulanisa oti iningi ngeyi omupokati gwaAmerika kombinga yimwe naRusia kombinga onkwawo, ye a kwathe nawa Angola ngoka e li "esipa pokati koombwa" omolwAACUBA na-Swapo mboka ye li mo.

Monkambadhala ndjika, Fulanisa ota ti ote shi ningi opo a mone Namibia lya manguluka pehulilo lyomumvo 1984.

Aatalinawa yoshinima otaa ti kutya, Fulanisa okwiitula kwe pokati "komakenge" ngoka gaali taga dhengelathana konima yaUnita na MPLA, ota taambwa ashike kuAngola ngele ta monika iti inyenge we mokangundu kayatano.

AAKWIITA AAKWIILONGO MUANGOLA NEMANGULUKO LYANAMIBIA

Pehulilo lyomumvo 1983, iifonkundana nooradio dhiilongo yokuuninginino, odha kala tadhi shi koleke, kutya Unita ota humu komeho nawa niita ye okukondjitha epangelo lyaAngola, MPLA.

Unita ye mwene okwa ti okwa dhipaga aakwiita ya MPLA, 106, Aacuba yatano, iihauto 17, noonkwatwa dhaaniilonga muAngola 11. (The Star 21.12.1983). Ehokololo olya tsikile kutya uumbugantuzilo woshilongo shaAngola auhe ou li melelo lyaUnita.

Ehangano lyaUnita olya shuna momuthitu konima yoomvula heyali dha zi ko, oshilongo sho sha lalwa kehangano ekwawo MPLA 1975, konima yiita iidhigu pokati koongundu ndhoka mbali.

Savimbi omuwiliki gwaUnita, ota gandja uusama ku MPLA, aniwa oshipundi okwe shi lala koonkondo nokekwa tho lyAACUBA. Ye MPLA wo ota yematele Unita, sho ta ti okwa ithanena aakwiita ya SA moshilongo noonakufutwa yalwe muuyuni wopondje.

Kombinga yiita, epangelo lyaAngola olya ti kutya olya dhipaga aakwiita 274 yaUnita moshitopolwa shaHuila nayalwe 180, oya kwatwa paiponokela yi ili noyi ili.

Moshitopolwa shaKwanza, MPLA ota ti okwa kwata mo okamba onene yoontauki 717 nodha shunwa melelo lyepangelo. (Observer 23.12.1983.) Iiningwanima mbika ongaashi wo iikwawo ya tetekele, oya hulile muNovomba gwa zi ko. Omalugodhi ngoka, ogo ihe hagi ipopilwa nago kuyamwe kutya oge li eimbo lyemanguluko lyaNamibia.

Okwiimba kwomusita-ngalo

Dha za kep. 10

Shika osha hala okutya, ando ngele eimbilo lyomEhangano tali imbwa, nangoye imba, opo sho to ka ya mo ngoye awike, u ka tameke shu ukila kuule wewi ndyoka lya li tali imbwa.

Nonando aasita ayehe oya tseya omaimbilo gawo, oto adha omusita ti imbi epuko ka li nando e na oku li imba. Omatompakano ga tya ngawo ohaga zi mpaka.

* Uuna omusita omaimbilo ine ga igilila, okwa fa inaa manguluka nawa, onkee ta tompakanitha.

* Ota tompakanitha, oshoka ini ilongekidha. Ngika onkene i ihulile okwiimba po mOsoondaha ya yi, okwe ga tala ogo omapu nokwiilongekidhilwa.

Otashi vulika gumwe manga e li kowalitali, opo ta dhiladhila kutya ota ka imba nando "Ngaashi ongala-ngombe ya hala okumona othithiya .."

* Gumwe kee shi shi okwiimba panshitwe. Mokuyelekela osho ngeyi ti imbi shi ili.

"Longelo lyOmuwa oli na ondilo neyambeko olindji."

Ompumbwe yemanguluko

Dha za kep. 11

OMBILI YOMWEDHI GUMWE YI INDILWA

Manga tuu uuyuni wa tegelela shono tashi ya po, omolwomathaneko gaFulanisa, ye Suid-Afrika mpaka oti indile epangelo lyaAngola pu ningwe emweneko lyomatati uule womwedhi gumwe.

Etameko lyelongitho lyeuvathano ndika, olya thanekwa ando li tameke eti 31 lyajana-ali 1984. Pamadhiladhilo gomwiindili, otali vulu wo okulelepekwa ngele olya monika kutya otali ende po nawa.

Ihe pamwe nalyo, SA okweendulula kutya ye okwiilongekidha okutula oshitokolitho 435 sha VVO miilonga, ethimbo kehe uuna AACuba ya za mo muAngola. Eindilo ndika olya gandjwa pethimbo lyomutumba gwOraata yegameno ya VVO, nolya

popilwa mbaLa kuAmerika.

Kombinga ya Swapo niilyo oyindji yoshigongi, oye li ekelehi. Pethimbo tatu nyola oshinyolwa shika, mombako yetumo lyomawi yaAmerika omwa zi onkundana kutya Angola okwa taamba eindilo lya SA.

Esiku olyo tuu ndyoka natango mombako yaAngola yetumo lyomawi, omwa zi onkundana, kutya epopyo lyaAmerika kali na omakankameno. Angola okwe endulula ngaashi shito nongaashi wo shi indilwa kOraata yegameno ya VVO, SA a kuthe mo aakwiita ye muumbugantu waAngola noshitokolitho 435, shi tulwe miilonga.

Moshipilili shiiningwanima ayihe mbyoka, kapu na we nando gumwe te ku lombwele sha yela uuna emanguluko lyaNamibia tali gandjwa. Ashike omumvo otu gu li natango petameko, *nomoonkondo dhegalikano ndyoka omuleshi to tsikile nalyo, etegame-no lyetu kali na siku nali kuka, sho tu shi shi Omunankondo pombanda ota vulu okulundulula uuyuni auhe muusiku umwe.*

OMAKONAKONO OMUDO 1983

Inapu shiivika manga ashike sha ningwa po kovahongwa va shangele shonakono lOstana onkhinano (Std. V) omudo wa dja ho, ashike osha fa tashi ulike ngo ouxwepo shi dulife omudo 1982.

Kovashangi vOmatiliha, inashi enda nawa unene meefikola dOvalaule. Ovashangi aveshe vekonakono 1,365, omwa dja ashike 850 va pita. Mwaavo va pita 68 aveke ve na oufemba wokutambulwa mofikola yokombada.

Kombinga yomanyamukulo aavo va shangele Ositanda onhihetatu (Std. VIII) nako inaku udiha sha natango.

Oinhoko imwe yomondjokonona yaNangolo Auala

Okukalamwenyo kwomubishopi Leonard Nangolo Auala, okuyadi oupuna woiningwanima, imwe iwa naikwao tai diladilifa omunhu mokule kutya omolwashike sha ningwa. Mondjokonona yokukalamwenyo kwaye oyo ya leshwa mefudiko laye komufita Jason Amakutuwa, otwa kufa mo oinhoko imwe tai shikula apa:

* Nangolo mooxe, oye okakadona koposhini, pepata nomumati koshuunda.

* Koufita woimuna, okwa xupifa mukwao Matias Albin, menota eshi e mu tekela omeva nokanya momufima mule, oo Matias kwa li ta nyengwa okulonda mo.

* Mouhamba waMartin Kadhikwa, oye hamushanga wohamba, omulangeli wayo nomutelekeli wayo.

* Koilonga kOushimba oye folomana yavakwao, omulongi wofikola yeshasho noyepameko.

* Pokati kaTsumeb nOwambo okwa endele po kolupadi ta ningi omafiku atatu ina lya ye ina nwa. Fimbo va teelega efyo namukwao Gabriel Nakatana, ova ilikana noshihomo

shodula osha pauka keulu nde tava nu nokutwikila ondjila fiyo va fika. Osha li mu-Kotoba.

* Omudo 1973, okwa pewa epapa kEhangano laEdward W. Browning, muAmerika, omolwokukondjela kwaye ombili.

* Omudo 1972, okwa xupa moshiponga shekandomo loshihauto, omo kwa li a teka eemhati nhatu.

* MuAmerika okwa twikwa eisho lipe nola twama.

* Mepopilo lOengeleki okwa lombwela ngaha epangelo: Ovasoomi ngenge tava tewa po apa, otava shuna kedu lavo laSoomi nehepuluku, itava hepa sha. Ovawambo ava ve va pumbwa ovo tava hepa, havaSoomi.

OMATUMBULO GE GA HUGUNINA

"Onda hala yaandjetu ye ye mpaka tu galikane, opo ndi ye kegumbo."

"Otandi tala iikumitha yaKalunga te yi ningile ndje."

"Aantu naa dhiginine eitaalo lyawo ndyoka ye li na. Naa kale ye na ombili naKalunga nonaantu ooyakwawo."

"Elongelokalunga moshituthi shUulalelo Uuyapuki."

"METiyali Shipena nameme Aina, otamu fala ndje kOshakati."

OONKALI DHAJASON AMAKUTUWA KOMUMBISOFI AUALA

Kandi etha oku mu lila, Ogwekongo lyetu. A nduungile nelila, lyokuMwene gwetu. A kala a loloka, A hiluluka. Ihe omu na ondhano, a kwata omukumo.

2. Shiyamakuti unduka, Omumati katuka. Kotha po vululukwa, Loololwa, fudhithwa. Omudhimba gu li moki, Lutu li li mevi. Masipa goye iipongo, Kaya na omongo.

3. Nangolo vululukwa, Loonata fudhithwa. U kale mukengeli, U li poOmukulili. Esiku to yumuka, Oto kaluluka. To nyantuka, to nuka, Nyanyu lya tuntuka.

OMUKWETU

Oye oshifo shOengeleki Onkwaevangeli paLuther yomOwambokavango.

Ohashi nyanyangidhwa mOshinyanyangidho shOengeleki mOnilpa.

Omukuluntu gwoshifo omumbisofi. Dr. Kleopas Dumeni, Amushanga gwoshifo omusita Sebulon Ekandjo

Ondando yOmukwetu muNamibia naSuid-Afrika R 5,00 komumvo.

Palwe muAfrika R 8,00 nokombanda yomafuta 11,00, komumvo. Mondhila R 13,00.

Oondando nomambestelo agehe naga tumwe kOmukwetu, Onilpa, P.Bag 2013, Ondangwa, 9000

EV. LUTH. OWAMBOKAVANGO CHURCH PRESS
PRIVATE BAG 2013, ONDANGWA 9000
SWA/NAMIBIA